

Mud Volapüka

Nüm 81

3 novul 2017

Bukemaboed

Finot lekoned-mära yutopik
„Ventürs hiel ‚Nenolikan‘ e flenas omik“
fa hiel „N. N. Nosov“

Kapit kildegid. Gevegam.

Dü dels mödik Nolikan kobü kompenans okik ädugolom da fels e fots e fino ereafom lomäni. Äleseatoms pö lubel löpik de kel ya Florazif jönik alogädon [pa=logon]. Hitüp ya äfinikon e flors jönikün äflorons pö süts [zifa]: krüsens vietik, daliads redik, rosads vielik. Kilköläviols jönik äsvo pabs äbundanons pö yads valik. Nasturts leredik ävoulons kiudis, völis domas ed äflorons igo pö nufs. Vien nevemik äspearükon smeli feinik reseda e kamisola.

Nolikan e kompenans okik äbradoms odi demü fred.

Pos brefüp utans ya äbestepoms sütis zifa lomik. Zifans äsejutons se doms valik ed älogedons tävanis obsik. Nenolikan e flens omik idofikoms so vemo [idagetoms täini so dofik] dub tev lunüpik, das primo nek ädientifükon omis.

Süpiko ek evokädon:

„O kompenans, ga Nolikan binom etanu! Ekö! logedolsös, atan golom bu valikans!“

Vokäds pä=lilons dese flans valik:

„Ekö! sanan: Pilulülan< koo komom! I yagan: Glöbülän<, Perönülän ä Bastetülän komoms!“

Zifans äfredons ed ävokädon:

„Yö!“

Ab jenet kion äjenon kü Nolikan kobü kompenans omik eflekom oki ad Kampanula-süt! Is belödans valik äbinons nilädanus u sevädanus etanas. Lövikans efulükons süti lölöfiko. Hicilils äbradoms ed äkidoms tävanis kuradik, e jicilils estürülofs petiolis bäliedas love veg lölik.

Süpiko dogil smalik elüjutedon de seimöp. At ävaulon, äbunülon zü yagan: Glöbülän< ed äläkon namis omik.

„O kompenans, ga atu binon Bulül obik!“ - yagan: Glöbülän< ävokädom.

Nilädans äkonons, das Bulül elomiovegon pos dels anik posä hicilils edeflitoms pö bälun. Kludo valikans äniludons, das Glöbülän kobü kompenans okik ipäridikom, e nek äspetöfon ad dönu-logön omis lifiku. Glöbülän egleipom Bulüli ed äkidom oni.

„O dogül fiedik löfik obik!“ - äsagom. - „Fädos-li, das no epäridikol? Ga so vemo älügob demü ol!“

Ettimo trup lövikanas epubon pö fin süta. Poedan: Florülän< ärönom bu valikans.

„Poedot!“ - valikans ävokädon. - „Nu poedot ojenädon!“

Jicilils äplodofs laodiko, ab hicilils ömik elü-röloms tubi vagik seimöpao ed ebu-pladoms oni ön stabül äl löpio zänodü süt.

Ek evokädon:

„O Florülän, xänolöd sui tub e deklamolöd poedoti!“

Egleipoys Florülani len jotaseps ed eyufoys omi ad bexänön tubi. Florülän äletikom brefüpo, äkögom bosilo, pas täno etenükom nami lü Nolikan e kompenans omik e fäkiko edeklamom poedoti, keli anu epoedom ebo is du ästanom su tub:

„Daladöfiko benogetedobs tevanis kuradik!

Kels idetävons pö bälun gretik,

Ab egevegons: Yö!<

Labölo bäluni nonik.“

„Yö-ö-ö!“ - lövikans ävokädons valöpo.

Sunädo edonio-tiroy's Florülani se tub. Hicilils etovoms atani me nams löpio ed äpoloms omi lomio, ab jicilils ävifagolofs pödo ed äbejedofs omi me petiols bäliedas.

Danädü poedot at Florülan efamikom äsif it eduinomöv tävi beno-distik at.

Tävans kuradik obsik emaifükoms kläpedili ed ägoloms lü dom oksik, keli nek äbelödon ya dü dels mödik. Te Nenolikan äblibom plödo pö süt. Äsölogom lügiko menamödoti mogolöl, poso ezü-logom äsif äsukom eki. Nek äkomon pö süt. Äsif valikans emoikons. Logs Nenolikana ecenons ad igo lügikums, ab ettimo eküpom pö fin güöfik süta magedi smalik, kel ästadon ön jad kiuda emaifükölo mudi okik e bluviko älülogedon lü om.

„O Flabülan!“ - Nenolikan evokädom, ememosevölo fleni okik, ed etenükom namis foi ok.

Flabülan elerorom demü fred ed ejutedom lü Nenolikan, ab Nenolikan ärörom kos etan. Flens tio ekobo-jokom ta od len floms ed estopikoms zänodü süt. Flabülan frediko älogedom fleni okik ivedöl tävanu sevädik, ab Nenolikan älogedom etani döbiko äsmililölo. Lunüpo ästanoms so, logedölo odi, ed äkanoms sagön nosi demü fäkam. Pas täno ebradoms odi, e drens ätofons se logs omsik.

Kolköm kion ejenon!

De ettim täv sevädik Nolikana e flenas omik efijenon. Aldelalif pö Florazif eprimon ad jenädön leigo äsä äjenädön ätimo... ye nö, no mögos ad stetön, das ut äjenädön ebo go äsä ätimo.

Sisä tävans kuradik obsik elomiovegons, äbepikoys te atanis pö zif. Zifans valik: e hicilils e jicilils< äkömons ün soar alik nilü dom Nolikana ed älelilons konotis tävanas dö lifatim onas pö Grünazif.

Bastetülan älöfilom ad mebön kekis benosmekik, kelis jicilils ädaifidofs ome, ab Sirupülan äpleidülom dö mödot karbatazüdavata ko sirup, keli efi-

drinom. Nolikan äkonom vatiðugodðemi jugik, fonedis e poni stunidabik, kelis jicilils ijafäðofs, ä vatamelunis gretik, kelis ji-etans ädabridofs. Dü atos Sirupulan ai äsüramenom püti vatameluna se pok ed äsagom:

„Kin äniludonöv, das mögos ad dagetön tubis ömik sirupa de püt at!“

Baülan e Spidülan bu val äplidoms konön utosi, vio äklopoms kobü jicilils. Skrubülan e Lebuonülan äkonoms cinami, fleni oksik: stiran Luibülan< ä cinädani e datikani: Boadaskrubülan< pö kelan valikos pa-tölaton me gnobs lektinik. Glöbülan vemiküno äplidom memikön vio älekäloys omi pö malädanöp e sananu vio-gudik Pulnomaran äbinof, kel ilekälof lögi omik pe-viodöl so gudiko, das kanom noe golön, abi vifagolön ed igo bunön. Blöfü atos Glöbülan äbunom pö lög bal ebo ot, kel pi-viodon.

Valikans äkonons flenami okik kol jicilils. Igo Seilan, kel vemo nesuvo äsagom vodi nemu bal, esagom:


„Vo, o kompenans, igo no äniludom büiko [ätimo], das mögos ad flenön so-beno kol jicilils leigoäs kol hicilils.

„Äseilolöv [Seilolöd] buikumo!“ - Nenolikan egesagom. - „No äküpob, das äflenol kol ek.“

„Ab äflenol-li üfo?“ - jicilils esäkofs omi.

„Äflenob kol Blövalogikan!“ - Nenolikan egesagom pleidülö.

„No ukredidol obis!“ - Gnob-ül-an esagof. - „Ga igo izanol kol flen olik: Flabülan< kodä utan flenom kol jicilils.“



„Lenö! Ya erekosilob Flabülani e denu it oflenob kol jicilils.“

„Kikodo no oflenol kol ofs büikumo üfo?“ - Kamisol-an esäkof.

„Äbinob vemo stupiku büikumo. Ädredob demü utos, das ö-hä-oys-öv-la obi if äflenoböv kol jicilils.“

„Ga i denu odredol atosi.“ - Gnobülan egesagof.

„Nö. Nu binob plagälanu. Vilol-li, das oflenob kol ol? Ab utan, kel osmilon dö atos, pu-flapon fa ob len flom.“

„No nedos dat flapoy eki kodü ob!“ - Gnobülan egesagof.

„Täno oflapob neki. Te no odemob kofetis.“

Nenolikan eflenikom kol Gnobülan e sis ettim if äküpom, das ek nofon jicilils, täno älügolom ed äsagom:

„Kikodo nofol jicilils? No bitolöd somiko denu! No nofoy jicilils pö obs.“

Demü atos jicilils eprimofs ad stümön omi ed ästetofs, das Nenolikan binom lövikanu vemo gudik. Dido hicilils retik äglötoms, das loboys Nenolikani, e koo eprimoms ad jelodön jicilils. Evedos, das blamabos ad dränälön jicilils pö Florazif. Üf jenot sümik äjenon, das hicilil seimik egebädöm mekädi [eflapom jicilili] ud nemu esagom zanädavödi jicilile, täno valikans äkofons etani ed ästetons, das etan binon lumanu bado-dugälik e nekulivanu grobälik, kel no sevon nomis kosedä kulivik.

Nu nek momofon jicilils kü vilofs pledön kobü hicilils, ab güo ai pa-lasumofs ad pled.

Suno Nolikan edatikom ad meikön vatadugodemi jugik love Florazif e bumön fonedis ömik: primo nemu balat [foned nemu bal] a süt alik. Zuo, eloseidom ad bumön poni love Küga-flumed, dat omögos ad tevön fotio futo. Jicilils elüblinofs okis vobode at äsi hicilils. De göd jü koled zifs valik ävobons pö bum pona, kulam vatadugodema e löbum fonedas. Pos koled valikans ädegolons ad pledön kontaga-pledi, kläneda-pledi, futa-glöpi u treila-glöpi.

Te Nenolikan nesuvo äkompenom pö plets. Äsagom:

„Nu no labob timi ad pledön. Ga töbo reidob e penob me tonats gretik.“

Ab zesüdiko mutob dalärnön ad penön gidöfiko. It sevob: lü kis atos nedon.“

Plas degolom ad pledön, Nenolikan äseidom oki len tab ed äprimom ad reidön. Aldelo äfi-reidom padi te bal, ab igo atos sio äseikon gaenäti. Ömna äfireidom igo padis tel a del: demü adel e demü odel. Efiduinölo reidami, äsumom pämi ed äprimom ad penön. Ya no plu äpenom me tonats gretiks ab me smaliks, do tonats primo no äfädons ad jöniks. Mitir-ots nejönik [tonats pe-mitir-öl] primo äsüikons pla tonats pö pämi omik, ab Nenolikan vemo ästeifom e pianiko efi-lärnom ad däsinön tonatis jönik: e gretikis e smalikis. Leplu badikumo äfädos kol niga-stens pö om.

Nenolikan suvo äkodom nigastenis pö pämi. Zuo, if kodom nigasteni, tän sunädo deläkom oni me lineg. Nigastens labü göbs lunik äfädons dub atos. Nenolikan änemom nigastenis göbik somik kometus [as komets]. Els „komets“ at äkomons ti pö pad alik päma omik. Ab Nenolikan no ädäspirikom, bi äsevom, das sufäl e lezil id ukoedons moükön omi elis „komets“.